

«ԱԼՖԱՍԵՔՅՈՒՐԻԹԻԶ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ մասնակիցի
01 դեկտեմբերի 2008թ. թիվ 12 որոշմամբ

ՀՀ կենտրոնական բանկում

Փոփոխված է «ԱԼՖԱՍԵՔՅՈՒՐԻԹԻԶ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ մասնակիցի
01 հունիսի 2012թ թիվ 3 որոշմամբ

Փոփոխված է «ԱԼՖԱՍԵՔՅՈՒՐԻԹԻԶ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ մասնակիցի
11 սեպտեմբերի 2013թ թիվ 10 որոշմամբ

Փոփոխված է «ԱԼՖԱՍԵՔՅՈՒՐԻԹԻԶ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ մասնակիցի
09 նոյեմբերի 2013թ թիվ 01 որոշմամբ

Փոփոխված է «ԱԼՖԱՍԵՔՅՈՒՐԻԹԻԶ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ մասնակիցի
10 հունիսի 2015թ թիվ 07 որոշմամբ

Փոփոխված է «ԱԼՖԱՍԵՔՅՈՒՐԻԹԻԶ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ 20
հոկտեմբերի 2022թ թիվ 09 որոշմամբ

Փոփոխված է «ԱԼՖԱՍԵՔՅՈՒՐԻԹԻԶ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ 27 մարտ
2025թ. թիվ 20250326-01 որոշմամբ

Փոփոխված է «ՎԻԼԿՈ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ 13 մայիսի
2025թ. թիվ 16 որոշմամբ

Փոփոխված է «ՎԻԼԿՈ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ 02 հուլիսի
2025թ. թիվ 22 որոշմամբ

Փոփոխված է «ՎԻԼԿՈ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ 05 օգոստոս
2025թ. թիվ 27 որոշմամբ

Փոփոխված է «ՎԻԼԿՈ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ 03 փետրվարի
2026 թ. թիվ 34 որոշմամբ

Ընկերության միակ մասնակից՝


Ստեփան Մակրի
«Այստերիս Մենեջմենթ» ՍՊԸ-ի տնօրեն,
ներկայացնող՝ «Պարադեպլատց Լիմիթեդ» ՍՊԸ

Գործադիր տնօրենի



ՀՀ կենտրոնական բանկի նախագահ

_____ Ի. Բելիշևկա

_____ Մ. Գալստյան

Կ Ա Ն Ո Ն Ա Դ Ր ՈՒ Թ Յ ՈՒ Ն

«ՎԻԼԿՈ»
ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅՈՒՆ
(նոր խմբագրությամբ)

ԵՐԵՎԱՆ 2026

1. ԸՆԴՀԱՆՈՒՐ ԴՐՈՒՅԹՆԵՐ

- 1.1. «ՎԻԼԿՈ» սահմանափակ պատասխանատվությամբ ընկերությունը (այսուհետև՝ ընկերություն) ստեղծվել է Հայաստանի Հանրապետության Քաղաքացիական Օրենսգրքին, «Սահմանափակ պատասխանատվությամբ ընկերությունների մասին» ՀՀ օրենքին, «Արժեթղթերի շուկայի մասին» ՀՀ օրենքին և գործող այլ իրավական ակտերին համապատասխան:
- 1.2. Ընկերությունը շահույթ ստանալու նպատակ հետապնդող առևտրային կազմակերպություն է, որը, որպես սեփականություն, ունի առանձնացված գույք և իր պարտավորությունների համար պատասխանատու է այդ գույքով, կարող է իր անունից ձեռք բերել և իրականացնել գույքային և անձնական ոչ գույքային իրավունքներ, կրել պարտականություններ, դատարանում հանդես գալ որպես հայցվոր կամ պատասխանող:
Ընկերությունը համարվում է ստեղծված և ձեռք է բերում իրավաբանական անձի կարգավիճակ ՀՀ կենտրոնական բանկում գրանցվելու օրվանից:
- 1.3. Ընկերության մասնակիցների ավանդները, դրանց հաշվին ստեղծված, ինչպես նաև ընկերության գործունեության ընթացքում արտադրված և ձեռք բերված գույքն ընկերությանն են պատկանում սեփականության իրավունքով և ընկերությունն ազատ է իր հայեցողությամբ տիրապետել, օգտագործել և տնօրինել դրանք:
- 1.4. Ընկերության մասնակիցների ավանդների արժեքից կազմվում է կանոնադրական կապիտալ, որը սահմանում է ընկերության պարտատերերի շահերը երաշխավորող ընկերության գույքի նվազագույն չափը:
- 1.6. Հայաստանի Հանրապետությունը կամ համայնքները պատասխանատվություն չեն կրում ընկերության պարտավորությունների համար, իսկ ընկերությունը պատասխանատվություն չի կրում Հայաստանի Հանրապետության կամ համայնքների պարտավորությունների համար:
- 1.7. Ընկերությունն իրավունք ունի սահմանված կարգով բանկային հաշիվներ բացել Հայաստանի Հանրապետության և օտարերկրյա պետությունների բանկերում:
- 1.8. Ընկերությունն ունի իր անվանմամբ կյոռ կնիք հայերեն, ռուսերեն և անգլերեն գրառումներով, դրոշմներ և ձևաթղթեր, օրենքով սահմանված կարգով գրանցված խորհրդանիշ, ապրանքային, առևտրային և այլ նշաններ:
- 1.9. Ընկերությունը կարող է լինել մեկ այլ ընկերության կամ ընկերակցության մասնակից (հիմնադիր), ստեղծել մասնաճյուղեր և ներկայացուցչություններ Հայաստանի Հանրապետությունում և այլ պետությունների տարածքում, գրանցման վայրում գործող օրենսդրությանը համապատասխան, եթե Հայաստանի Հանրապետության միջազգային պայմանագրերով այլ բան նախատեսված չէ:
- 1.10. Ընկերության ֆիրմային անվանումն է.
հայերեն լրիվ՝ «ՎԻԼԿՈ» Սահմանափակ պատասխանատվությամբ ընկերություն
հայերեն կրճատ՝ «ՎԻԼԿՈ» ՍՊԸ
ռուսերեն լրիվ՝ Общество с ограниченной ответственностью “ВИЛКО”
ռուսերեն կրճատ՝ ООО “ВИЛКО”
անգլերեն լրիվ՝ “WILCO” Limited liability company
անգլերեն կրճատ՝ “WILCO” LLC
- 1.11. Ընկերության գտնվելու վայրը և փոստային հասցեն է ՀՀ, ք. Երևան 0002, Սարյան 26/2:
- 1.12. Ընկերության գործունեության տևողությունը չի սահմանափակվում:

2. ԸՆԿԵՐՈՒԹՅԱՆ ԳՈՐԾՈՒՆԵՈՒԹՅՈՒՆ

- 2.1. Ընկերության գործունեության նպատակն է Հայաստանի Հանրապետությունում և նրա սահմաններից դուրս ներդրումային ծառայություններ մատուցելու ճանապարհով շահույթի ստացումը:
- 2.2. Ընկերությունն իրավունք ունի մատուցել ներդրումային ծառայություններ ՀՀ կենտրոնական բանկից ներդրումային ծառայությունների մատուցման լիցենզիա ստանալու օրվանից:
- 2.3. Ընկերությունն իրավունք ունի իր գործառույթներն իրականացնել բացառապես անկանխիկ եղանակով:

3. ԸՆԿԵՐՈՒԹՅԱՆ ԿԱՆՈՆԱԴՐԱԿԱՆ ԿԱՊԻՏԱԼԸ

- 3.1. Ընկերության կանոնադրական կապիտալը կազմում է 6,999,553,750 (Վեց միլիարդ ինն հարյուր իննսունինն միլիոն հինգ հարյուր հիսուներեք հազար յոթ հարյուր հիսուն դրամ) ՀՀ դրամ:

Կանոնադրական կապիտալն ամբողջությամբ վճարված է և պատկանում է ընկերության միակ մասնակցին՝ «Պարադեպլատո Լիմիթեդ», Կիպրոսի Հանրապետության օրենսդրության համաձայն 2024թ. ապրիլի 9-ին գրանցված սահմանափակ պատասխանատվությամբ ընկերությանը:

3.2. Ընկերության մասնակիցները (հիմնադիրները) պարտավոր են ամբողջությամբ ներդնել իրենց ավանդները կանոնադրական կապիտալում ընկերության պետական գրանցման պահից մեկ տարվա ընթացքում, ընդ որում, ընկերության պետական գրանցման պահին պետք է վճարված լինի ընկերության կանոնադրական կապիտալի առնվազն կեսը:

3.3. Ընկերության կանոնադրական կապիտալում մասնակիցների կամ ընկերության մեջ ընդգրկվող երրորդ անձանց կողմից ոչ դրամային ավանդներ ներդնելու դեպքում դրանց դրամական գնահատականը կատարվում է «Սահմանափակ պատասխանատվությամբ ընկերությունների մասին» ՀՀ օրենքի 29 հոդվածով սահմանված կարգով:

Ոչ դրամային ավանդների դրամական գնահատականը հաստատվում է ընկերության մասնակիցների ընդհանուր ժողովի կողմից միաձայն կարգով:

Ընկերության կանոնադրական կապիտալի չափը չի կարող պակաս լինել գործող օրենսդրությամբ սահմանված նվազագույն արժեքից:

3.4 Ընկերության կանոնադրական կապիտալի ավելացումը հնարավոր է միայն այն ամբողջությամբ վճարելուց հետո:

Ընկերության կանոնադրական կապիտալի ավելացումը կարող է իրականացվել ընկերության գույքի հաշվին, մասնակիցների լրացուցիչ ներդրումների հաշվին կամ ընկերության մեջ ընդունվող երրորդ անձանց ավանդների հաշվին:

Ընկերության գույքի հաշվին կանոնադրական կապիտալի ավելացման դեպքում համապատասխանորեն մեծանում է նաև մասնակիցների բաժնեմասերի անվանական արժեքը՝ անփոփոխ թողնելով դրանց չափը:

Ընկերության կանոնադրական կապիտալի ավելացումը նրա մասնակիցների լրացուցիչ ավանդների և ընկերություն ընդունվող երրորդ անձանց ավանդների հաշվին իրականացվում է «Սահմանափակ պատասխանատվությամբ ընկերությունների մասին» ՀՀ օրենքի 33 հոդվածով սահմանված կարգով:

Ընկերության մասնակցի դիմումի հիման վրա այդ մասնակցի կողմից լրացուցիչ ավանդ ներդնելու միջոցով կանոնադրական կապիտալի ավելացման վերաբերյալ որոշում ընդունվում է ընկերության մասնակիցների կողմից՝ միաձայն:

3.5 Ընկերության կանոնադրական կապիտալի նվազեցումը իրականացվում է ընկերության մասնակիցների բաժնեմասերի անվանական արժեքների նվազեցման և (կամ) ընկերությանը պատկանող բաժնեմասերի մարման ճանապարհով:

Ընկերության մասնակիցների բաժնեմասերի անվանական արժեքը նվազեցնելու ճանապարհով ընկերության կանոնադրական կապիտալի նվազեցման դեպքում մասնակիցների բաժնեմասերի չափերը չեն փոխվում:

Կանոնադրական կապիտալի նվազեցման մասին որոշում ընդունելուց հետո ընկերությունը պարտավոր է 30 օրվա ընթացքում այդ մասին և կանոնադրական կապիտալի նոր չափի մասին գրավոր տեղեկացնել իրեն հայտնի ընկերության բոլոր պարտատերերին: Ընկերության պարտատերերն իրավունք ունեն գրավոր տեղեկացումն ստանալու պահից 30 օրվա ընթացքում, պահանջել իրենց նկատմամբ ընկերության պարտավորությունների վաղաժամկետ դադարում կամ կատարում, ինչպես նաև իրենց վնասների հատուցում:

3.6. Ընկերության պետական գրանցումից հետո՝ մեկ տարվա ընթացքում, կանոնադրական կապիտալն ամբողջությամբ չվճարելու դեպքում ընկերությունը պարտավոր է նվազեցնել կանոնադրական կապիտալը մինչև փաստացի վճարված չափը, կամ որոշում ընդունել ընկերության լուծարման մասին:

3.7. Եթե երկրորդ կամ յուրաքանչյուր հաջորդ ֆինանսական տարվա ավարտից հետո ընկերության գույք ակտիվների արժեքը պակաս է կանոնադրական կապիտալից, ապա ընկերությունը պարտավոր է նվազեցնել իր կանոնադրական կապիտալը:

4. ԸՆԿԵՐՈՒԹՅԱՆ ՀԻՄՆԱԴՐԱՄՆԵՐԸ

4.1. Ընկերությունն ունի պահուստային հիմնադրամ, որը ստեղծվում է ընկերության շահույթից մասհանումների հաշվին, կանոնադրական կապիտալի արժեքի 15 տոկոսի չափով:

4.2. Պահուստային հիմնադրամը ձևավորվում է շահույթի առնվազն հինգ տոկոսի չափով կատարվող մասհանումներից:

4.3. Պահուստային հիմնադրամն օգտագործվում է ընկերության կորուստները ծածկելու համար, եթե ընկերության շահույթն այդ նպատակին չի բավարարում:

Պահուստային հիմնադրամը չի կարող օգտագործվել այլ նպատակների համար:

5. ԸՆԿԵՐՈՒԹՅԱՆ ԿԱՆՈՆԱԴՐԱԿԱՆ ԿԱՊԻՏԱԼՈՒՄ ԲԱԺՆԵՄԱՍԸ ՓՈԽԱՆՑԵԼԸ

- 5.1. Ընկերության մասնակիցն իրավունք ունի ընկերության կանոնադրական կապիտալում իր բաժնեմասը (դրա մասը) վաճառել կամ այլ ձևով օտարել տվյալ ընկերության մեկ կամ մի քանի մասնակիցների, իսկ բոլոր մասնակիցների համաձայնության դեպքում՝ վաճառել կամ այլ ձևով օտարել երրորդ անձանց:
- 5.2. Ընկերության մասնակիցներն իրենց բաժնեմասերին համամասնորեն օգտվում են մասնակցի բաժնեմասը (դրա մասը) գնելու նախապատվության իրավունքից այն գնով, որն առաջարկվել է երրորդ անձանց:
- Ընկերության մասնակիցը, որը ցանկանում է վաճառել իր բաժնեմասը (դրա մասը) երրորդ անձին, պարտավոր է այդ մասին գրավոր տեղյակ պահել ընկերությանը՝ նշելով գինը և վաճառքի մյուս պայմանները: Ընկերությունն այդ մասին 5 օրվա ընթացքում գրավոր հայտնում է ընկերության մասնակիցներին: Այն դեպքում, երբ ընկերության մասնակիցները տեղեկացվելու օրվանից 15 օրվա ընթացքում չեն օգտվում բաժնեմասը (դրա մասը) գնելու նախապատվության իրավունքից, մասնակցի բաժնեմասը կարող է օտարվել երրորդ անձի:
- 5.3. Բաժնեմասի օտարումը իրականացվում է պարզ գրավոր ձևով ձևակերպված համապատասխան պայմանագրով («Քաղաքացիական Օրենսգրքով նախատեսված դեպքերում» վավերացված նոտարական կարգով):
- Բաժնեմասը ձեռք բերողին փոխանցվում են ընկերության մասնակցի մինչև բաժնեմասի օտարումը ծագած իրավունքներն ու պարտականությունները:
- 5.4. Ընկերության մասնակցի մահվան (վերակազմակերպման) ժամանակ կանոնադրական կապիտալում նրա բաժնեմասն անցնում է մասնակցի ժառանգներին (իրավահաջորդներին): Ժառանգների (իրավահաջորդների) ընկերության մասնակից դառնալուց հրաժարվելու դեպքում ընկերությունը պարտավոր է նրանց վճարել համապատասխան բաժնեմասը սույն կանոնադրության 9-րդ կետի 2 ենթակետով սահմանված կարգով:

6. ԸՆԿԵՐՈՒԹՅԱՆ ԳՈՒՅՔՈՒՄ ՄԱՍՆԱԿՑԻ ԲԱԺՆԵՄԱՍԻ ՎՐԱ ԲՈՆԱԳԱՆՁՈՒՄ ՏԱՐԱԾԵԼԸ ԿԱՄ ԲՈՆԱԳՐԱՎԵԼԸ

- 6.1. Ընկերության մասնակցի պարտքերի համար պարտատերերի պահանջով նրա բաժնեմասի վրա կարող է բռնագանձում տարածվել միայն այդ մասնակցի պարտքերը մարելու համար այլ գույքի անբավարարության դեպքում՝ դատարանի վճռի հիման վրա:
- 6.2. Ընկերության մասնակցի բաժնեմասը կարող է բռնագրավվել միայն օրենքով նախատեսված դեպքերում:
- 6.3. Ընկերության մասնակցի բաժնեմասի բռնագանձումը կամ բռնագրավումը իրականացվում է «Սահմանափակ պատասխանատվությամբ ընկերությունների մասին» ՀՀ օրենքի 20 հոդվածով սահմանված կարգով:
- 6.4. Ընկերության գույքում մասնակցի ամբողջ մասի վրա բռնագանձում տարածելը կամ բաժնեմասն ամբողջությամբ բռնագրավելը դադարեցնում է նրա մասնակցությունն ընկերությանը:

7. ԸՆԿԵՐՈՒԹՅԱՆ ՄԱՍՆԱԿԻՑՆԵՐԸ

- 7.1. Ընկերության մասնակիցներ (հիմնադիրներ) կարող են լինել ֆիզիկական և իրավաբանական անձինք, ինչպես նաև Հայաստանի Հանրապետությունը և համայնքները՝ գործող օրենսդրությամբ սահմանված կարգով:
- Պետական և տեղական ինքնակառավարման մարմիններն ընկերության մասնակից (հիմնադիր) չեն կարող լինել:
- 7.2. Մեկ մասնակից ունենալու (մնալու) դեպքում ընկերության միակ մասնակիցն իրականացնում է գործող օրենսդրությամբ և սույն կանոնադրությամբ ընկերության մասնակիցներին վերապահված իրավունքները և պարտականությունները:
- Ընկերությունը՝ որպես մեկ հիմնադիր (մասնակից) չի կարող հիմնադրել կամ ունենալ այլ տնտեսական ընկերություն, որը բաղկացած է մեկ անձից:
- 7.3. Ընկերության մասնակիցների թիվը չպետք է գերազանցի 49-ը:

8. ԸՆԿԵՐՈՒԹՅԱՆ ՄԱՍՆԱԿԻՑՆԵՐԻ ԻՐԱՎՈՒՆՔՆԵՐՆ ՈՒ ՊԱՐՏԱԿԱՆՈՒԹՅՈՒՆՆԵՐԸ

8.1. Ընկերության մասնակիցներն իրավունք ունեն.

- մասնակցել ընկերության մասնակիցների ընդհանուր ժողովին՝ վերջինիս իրավասությանը պատկանող բոլոր հարցերի նկատմամբ ձայնի իրավունքով;
- մասնակցել ընկերության կառավարմանը;
- տեղեկատվություն ստանալ ընկերության գործունեության մասին, ծանոթանալ նրա հաշվապահական գրքերին և այլ փաստաթղթերին;
- ստանալ ընկերության գործունեությունից ստացվող՝ օրենքով սահմանված շահույթի մասը;
- ընկերության մասնակիցների ընդհանուր ժողովում իր իրավունքները ներկայացնելու համար լիազորել երրորդ անձի;
- սույն կանոնադրությամբ սահմանված կարգով իր բաժնեմասը (դրա մասը) օտարել ընկերության մեկ կամ մի քանի մասնակիցների կամ երրորդ անձանց;
- անկախ մյուս մասնակիցների համաձայնությունից ցանկացած պահի դուրս գալ ընկերությունից;
- հայցով դիմել դատարան, ընկերության մասնակիցների ընդհանուր ժողովի կողմից ընդունված, գործող օրենքներին և այլ իրավական ակտերին հակասող որոշումների գանգատարկման նպատակով;
- ընկերության լուծարման դեպքում ստանալ պարտատերերի հետ կատարված հաշվարկներից հետո մնացած գույքի իր հասանելիք մասը կամ դրա արժեքը;
- օրենքով սահմանված կարգով գրավ դնել ընկերության գույքում իր բաժնեմասի իրավունքը:

8.2. Ընկերության մասնակիցները պարտավոր են.

- ավադներ ներդնել սույն կանոնադրությամբ նախատեսված կարգով, չափերով և ժամկետներում;
- չհրապարակել ընկերության գործունեության վերաբերյալ գաղտնիք պարունակող տեղեկություններ, բացի օրենքով սահմանված դեպքերից;
- իր գործողություններով չխոչընդոտել ընկերության գործունեության նորմալ գործընթացին;
- ժամանակին կատարել ընկերության նկատմամբ ստանձնած պարտավորությունները;
- ընկերության գույքում իր բաժնեմասի իրավունքը գրավ դնելու դեպքում այդ մասին անհապաղ տեղեկացնել ընկերությանը;
- ենթարկվել օրենքների, այլ իրավական ակտերի և սույն Կանոնադրության պահանջներին:

9. ՄԱՍՆԱԿՑԻ ԴՈՒՐՍ ԳԱԼԸ ԸՆԿԵՐՈՒԹՅՈՒՆԻՑ

- 9.1. Ընկերության մասնակիցը, անկախ մյուս մասնակիցների համաձայնությունից, իրավունք ունի ցանկացած ժամանակ դուրս գալ ընկերությունից:
- 9.2. Ընկերության մասնակցի՝ ընկերությունից դուրս գալու դիմումը ներկայացնելու պահից նրա բաժնեմասը փոխանցվում է ընկերությանը: Ընկերությունը պարտավոր է այդ պահից՝ վեց ամսվա ընթացքում, մասնակցին վճարել բաժնեմասի նրա վճարած մասի արժեքը: Դուրս եկող մասնակցի և ընկերության համաձայնությամբ դուրս եկող մասնակցին կարող է տրվել նրա բաժնեմասի լրիվ վճարված մասի արժեքին համապատասխանող գույք:
- Դուրս եկող մասնակցին հասանելիք ընկերության գույքի մասը կամ դրա արժեքը որոշվում է դուրս գալու դիմումը ներկայացնելու պահին ընկերության վերջին հաշվետու ժամանակաշրջանի հաշվապահական հաշվետվությունների հիման վրա:
- 9.3. Եթե ընկերության կանոնադրական կապիտալում որպես ավանդ ներ է դրվել գույքի օգտա-գործման իրավունք, ապա համապատասխան գույքը վերադարձվում է ընկերությունից դուրս եկող մասնակցին: Նման գույքի բնականոն մաշվածության հետևանքով նվազած արժեքը չի հատուցվում:

10. ԸՆԿԵՐՈՒԹՅԱՆ ՄԱՍՆԱԿՑԻՆ ԸՆԿԵՐՈՒԹՅՈՒՆԻՑ ՀՆՈԱՑՆԵԼԸ

- 10.1. Ընկերության մասնակիցը (մասնակիցները), որը (որոնք) գումարային առումով տնօրինում է (են) ընկերության առնվազն 10% բաժնեմասը, իրավունք ունի (ունեն) դատական կարգով պահանջել ընկերության այլ մասնակցի հեռացումն ընկերությունից, եթե նա իր գործողություններով կամ անգործությամբ դժվարացնում կամ անհնարին է դարձնում ընկերության բնականոն գործունեությունը:
- 10.2. Ընկերությունից հեռացված մասնակցի բաժնեմասն անցնում է ընկերությանը: Ընկերությունը հեռացված մասնակցին վճարում է նրա բաժնեմասի արժեքը, որը որոշվում է սույն կանոնադրության 9-րդ կետի 2 ենթակետով սահմանված կարգով:

11. ԸՆԿԵՐՈՒԹՅԱՆԸ ՊԱՏԿԱՆՈՂ ԲԱԺՆԵՄԱՍԵՐԸ

- 11.1. Ընկերությանը պատկանող բաժնեմասերը հաշվի չեն առնվում մասնակիցների ընդհանուր ժողովի կողմից որոշումների ընդունման ժամանակ քվեարկության արդյունքները որոշելիս, ինչպես նաև ընկերության լուծարման դեպքում գույքը բաշխելիս:
- 11.2. Ընկերության մասնակցին պատկանող բաժնեմասն ընկերությանն անցնելուց հետո՝ մեկ տարվա ընթացքում մասնակիցների ընդհանուր ժողովի միաձայն որոշմամբ պետք է բաշխվի ընկերության բոլոր մասնակիցների միջև՝ նրանց բաժնեմասերին համապատասխան, կամ ընկերության մեկ կամ մի քանի մասնակիցների, կամ երրորդ անձանց, և ամբողջությամբ վճարվի:
- Բաժնեմասի չբաշխված մասը պետք է մարվի ընկերության կանոնադրական կապիտալի նվազեցման միջոցով:

12. ՃԱՀՈՒՅԹԻ ԲԱՇԽՈՒՄՆ ԸՆԿԵՐՈՒԹՅԱՆ ՄԱՍՆԱԿԻՑՆԵՐԻ ՄԻՋԵՎ

- 12.1. Ընկերությունը տարեկան մեկ անգամ մասնակիցների ընդհանուր ժողովի որոշմամբ իրականացնում է իր շահույթի բաշխումն ընկերության մասնակիցների միջև:
- Բաշխման ենթակա շահույթը բաշխվում է ընկերության մասնակիցների միջև ըստ ընկերության կանոնադրական կապիտալում նրանց բաժնեմասերի չափերի:
- 12.2. Ընկերությունն իրավունք չունի որոշում ընդունել շահույթի բաշխման մասին կամ ընկերության մասնակիցներին վճարել շահույթ, որի բաշխման մասին որոշումն արդեն ընդունված է՝
- մինչև ընկերության կանոնադրական կապիտալի լրիվ վճարումը;
 - եթե որոշման ընդունման պահին ընկերության գուտ ակտիվների արժեքը փոքր է նրա կանոնադրական կապիտալից կամ այդ չափից փոքր կդառնա նման որոշման ընդունման արդյունքում;
 - ՀՀ օրենսդրությամբ նախատեսված այլ դեպքերում:

13. ԸՆԿԵՐՈՒԹՅԱՆ ԿԱՌԱՎԱՐՈՒՄԸ

- 13.1. Ընկերության կառավարման բարձրագույն մարմինը (իրավասու կառավարման մարմին) նրա մասնակիցների ընդհանուր ժողովն է (հետագա տեքստում՝ ընդհանուր ժողով), որն ունի կառավարման և գործունեության ցանկացած հարցի վերջնական լուծման իրավունք:
- Ընկերությունը մեկ անձի կողմից հիմնադրվելու (մեկ մասնակից մնալու) դեպքում ընդհանուր ժողովի իրավասություններն իրականացնում է ընկերության միակ մասնակիցը:
- 13.2. Ընկերության ընդհանուր ժողովի բացառիկ իրավասությանն են պատկանում՝
- ընկերության գործունեության հիմնական ուղղությունների որոշումը;
 - ընկերության պլանների և դրանց կատարման վերաբերյալ հաշվետվությունների հաստատումը;
 - ընկերության կանոնադրության, դրա լրացումների և փոփոխությունների, նոր խմբագրությամբ կանոնադրության հաստատումը;
 - ընկերության կանոնադրական կապիտալի չափի փոփոխումը;
 - ընկերության գործադիր մարմինների ձևավորումը և նրանց լիազորությունների վաղաժամկետ դադարեցումը, ինչպես նաև ընկերության գործադիր մարմնի լիազորություններն առևտրային կազմակերպությանը կամ անհատ ձեռնարկատիրոջը (կառավարիչ) տալու հարցերը;
 - ընկերության ներքին աուդիտի ստորաբաժանման ղեկավարի և անդամների ընտրությունը և նրանց լիազորությունների վաղաժամկետ դադարեցումը;
 - ընկերության տարեկան հաշվետվությունների և հաշվապահական հաշվեկշիռների հաստատումը, շահույթների ու վնասների բաշխումը;
 - այլ ընկերություններին կամ կազմակերպություններին մասնակից (հիմնադիր) լինելու մասին որոշման ընդունումը;
 - մասնաճյուղերի, ներկայացուցչությունների և հիմնարկների ստեղծումը, դրանց կանոնադրությունների հաստատումը, վերակազմակերպումը, լուծարումը;
 - ընկերության պաշտոնատար անձանց գույքային պատասխանատվության ենթարկելու մասին որոշման ընդունումը;
 - ընկերության ներքին գործունեությունը կարգավորող փաստաթղթերի հաստատումը;
 - ընկերության կողմից արժեթղթերի թողարկման մասին որոշման ընդունումը;
 - ընկերության կանոնադրական կապիտալի արժեքի 1/4-ը գերազանցող պայմանագրերին հավանություն տալը;
 - ընկերության աուդիտի իրականացման որոշման ընդունումը;

- ընկերությունը վերակազմակերպելու կամ լուծարելու մասին որոշման ընդունումը;
 - լուծարման հանձնաժողովի նշանակումը և լուծարման հաշվեկշռի ընդունումը;
 - «Սահմանափակ պատասխանատվությամբ ընկերությունների մասին» ՀՀ օրենքով և սույն Կանոնադրությամբ նախատեսված այլ հարցերի լուծումը:
- 13.3. Ընկերության գործունեության տարեկան արդյունքները հաստատվում են ընկերության հերթական ընդհանուր ժողովում, որն անցկացվում է ֆինանսական տարվա ավարտից 2 ամիս անց՝ 3 ամսվա ընթացքում:
- Հերթական ընդհանուր ժողովից բացի գումարվող ժողովները համարվում են արտահերթ: Արտահերթ ընդհանուր ժողովները գումարվում են անհետաձգելի հարցերի քննարկման համար:
- Հերթական և արտահերթ ընդհանուր ժողովները հրավիրվում են ընկերության գործադիր մարմնի կողմից:
- 13.4. Ընկերության գործադիր մարմինը ընդհանուր ժողովի անցկացման օրվանից 20 օր առաջ այդ մասին պատվիրված նամակներով ծանուցում է բոլոր մասնակիցներին:
- Ծանուցման մեջ պետք է նշված լինեն ընդհանուր ժողովի անցկացման տեղը, ամսաթիվը, ժամը և առաջարկվող օրակարգը:
- Ընկերության մասնակիցների կողմից օրակարգի վերաբերյալ առաջարկությունների և լրացումների ներկայացումը, գործադիր մարմնի կողմից դրանք օրակարգում ընդգրկելը և այդ մասին մասնակիցներին ծանուցելը ընդհանուր ժողովի օրակարգը նախապատրաստելիս մասնակիցներին անհրաժեշտ տեղեկատվության և նյութերի տրամադրումն իրականացվում է «Սահմանափակ պատասխանատվությամբ ընկերությունների մասին» ՀՀ օրենքի 39 հոդվածով սահմանված կարգով:
- 13.5. Ընդհանուր ժողովի բացումից առաջ կատարվում է ընկերության ժամանած մասնակիցների գրանցում:
- Ընկերության մասնակիցը ընդհանուր ժողովում մասնակցելու իր իրավունքը կարող է իրականացնել անձամբ կամ լիազորված ներկայացուցչի միջոցով:
- Մասնակցի ներկայացուցիչը կարող է մասնակցել ընկերության ընդհանուր ժողովին միայն օրենքով սահմանված կարգով ձևակերպված լիազորագրի առկայության դեպքում: Մասնակիցը պահպանում է ընկերության ընդհանուր ժողովում մասնակցելու առաջնային իրավունքը՝ անկախ իր կողմից ներկայացուցչին տրված լիազորագրից:
- 13.6. Ընկերության ընդհանուր ժողովն իր նիստը վարելու համար ընկերության մասնակիցների կազմից ընտրում է ժողովի նախագահին:
- 13.7. Ընկերության ընդհանուր ժողովն իրավագոր է, եթե դրան մասնակցում են ընկերության մասնակիցների ձայների ընդհանուր թվի կեսից ավելին տնօրինող մասնակիցները:
- Ընկերության յուրաքանչյուր մասնակից ընդհանուր ժողովում ունի ընկերության կանոնադրական կապիտալում իր լիքի վճարած բաժնեմասին համապատասխան ձայների քանակ:
- 13.8. Ընկերության ընդհանուր ժողովում սույն Կանոնադրությամբ նախատեսված դեպքերում, ինչպես նաև ընկերության վերակազմակերպման և լուծարման մասին որոշումներն ընդունվում են բոլոր մասնակիցների մասնակցությամբ՝ միաձայն, կանոնադրության, դրա լրացումների և փոփոխությունների հաստատման, ինչպես նաև կանոնադրական կապիտալի փոփոխման մասին որոշումներն ընդունվում են ընկերության մասնակիցների (նրանց ներկայացուցիչների) ձայների ընդհանուր թվի առնվազն երկու երրորդի մեծամասնությամբ, մնացած հարցերի վերաբերյալ՝ ձայների ընդհանուր թվի պարզ մեծամասնությամբ:
- 13.9. Ընդհանուր ժողովի որոշումներն ընդունվում են բաց քվեարկությամբ:
- Ընդհանուր ժողովի որոշմամբ օրակարգի որոշ հարցերի վերաբերյալ որոշումները կարող են ընդունվել քվեաթերթիկների միջոցով կատարվող քվեարկություններով: Այդ դեպքում ընդհանուր ժողովը սահմանում է մասնակիցներին քվեաթերթիկների տրամադրման կարգը, քվեաթերթիկների ձևն ու բովանդակությունը, քվեարկության արդյունքների հաշվառման և արձանագրության կազմման կարգը:
- 13.10. Ընկերության գործադիր մարմինը կազմակերպում է ընդհանուր ժողովի արձանագրության վարումը:
- 13.11. Ընկերության ընդհանուր ժողովին խորհրդակցական ձայնի իրավունքով կարող են մասնակցել ընկերության մասնակից չհանդիսացող ընկերության գործադիր մարմնի անդամները:
- 13.12. Ընկերության ընդհանուր ժողովի կողմից ընթացիկ գործերի ղեկավարման համար նշանակվում է գործադիր մարմինը՝ ընկերության գործադիր տնօրենը:
- Ընկերության և գործադիր տնօրենի միջև կնքվում է պայմանագիր, որը սահմանում է գործադիր տնօրենի իրավունքները, պարտականությունները, պատասխանատվությունը, փոխհարաբերությունները մասնակիցների և աշխատավորական կոլեկտիվի հետ, նրա աշխատանքի

վարձատրման պայմանները, պայմանագրի ժամկետը, պայմանագրի դադարեցման և լուծման հիմքերը և այլ դրույթներ, որոնք անհրաժեշտ են և չեն հալկասում գործող օրենսդրությանը: Ընկերության գործադիր տնօրենը լուծում է բոլոր հարցերը, բացի ընդհանուր ժողովի բացառիկ իրավասությանը վերաբերվող հարցերից:

13.13. Ընկերության գործադիր տնօրենը՝

- տնօրինում է ընկերության գույքը, այդ թվում՝ ֆինանսական միջոցները, գործարքներ է կատարում ընկերության անունից;
- կազմակերպում է ընդհանուր ժողովի որոշումների կատարումը;
- ներկայացնում է ընկերությունը Հայաստանի Հանրապետությունում և արտասահմանում;
- գործում է առանց լիազորագրերի;
- տալիս է լիազորագրեր՝ ընկերության անունից ներկայացուցչություն կատարելու իրավունքի համար, այդ թվում՝ վերալիազորման իրավունքով լիազորագրեր;
- գործող օրենսդրությամբ սահմանված կարգով կնքում է պայմանագրեր, այդ թվում՝ աշխատանքային;
- բանկերում բացում է ընկերության հաշվարկային և այլ հաշիվներ, այդ թվում՝ տարադրամային հաշիվներ;
- ընկերության ընդհանուր ժողովի հաստատմանն է ներկայացնում ընկերության աշխատանքային կանոնակարգը, ընկերության հիմնարկների, մասնաճյուղերի և ներկայացուցչությունների կանոնադրությունները, վարչակազմակերպական կառուցվածքը;
- իր իրավասության սահմաններում արձակում է հրամաններ, հրահանգներ, տալիս է կատարման համար պարտադիր ցուցումներ և վերահսկում դրանց կատարումը;
- սահմանված կարգով աշխատանքի է ընդունում և աշխատանքից ազատում է ընկերության աշխատակիցներին;
- աշխատակիցների նկատմամբ կիրառում է խրախուսման և կարգապահական պատասխանատվության միջոցառումներ:
- Ընկերության գործադիր տնօրենն իրավունք չունի մասնակիցների համար պարտադիր որոշումներ կայացնելու:

13.14. Ընկերության գործադիր տնօրենն այլ կազմակերպություններում կարող է վճարովի պաշտոններ զբաղեցնել միայն ընդհանուր ժողովի համաձայնությամբ:

13.15. Ընկերության գործադիր տնօրենն իր գործունեության մասին հաշվետու է ընդհանուր ժողովին:

13.16. Ընկերության գործադիր տնօրենն օրենքով սահմանված կարգով պատասխանատվություն է կրում իր գործողությունների հետևանքով ընկերությանը պատճառած վնասի համար: Գործադիր տնօրենը հասցված վնասի դիմաց պատասխանատվությունից ազատվում է ընկերության և գործադիր տնօրենի միջև կնքված պայմանագրով նախատեսված դեպքերում:

13.17. Անհրաժեշտության դեպքում ընկերությունը կարող է ձևավորել խորհուրդ: Այդ դեպքում ընկերությունը պարտավոր է փոփոխություններ մտցնել սույն Կանոնադրության մեջ՝ սահմանելով խորհրդի ընտրության կարգը, իրավասությունները և պատասխանատվությունը:

14. ԸՆԿԵՐՈՒԹՅԱՆ ՖԻՆԱՆՍԱՏՆՏԵՍԱԿԱՆ ԳՈՐԾՈՒՆԵՈՒԹՅԱՆ ՎԵՐԱՀՄԿՈՒՄԸ, ՀԱՇՎԱՌՈՒՄԸ, ՀԱՇՎԵՏՎՈՒԹՅՈՒՆՆԵՐԸ

14.1. Ընկերությունը պարտավոր է ունենալ համապատասխան ներքին հսկողության համակարգ, որը կներառի ընկերության կառավարման և գործունեության բոլոր մակարդակները: Այդ նպատակի իրագործման համար Ընկերությունը պարտավոր է ունենալ ներքին աուդիտի անկախ ստորաբաժանում: Ներքին աուդիտի ղեկավար/անդամ/ չի կարող լինել ընկերության կառավարման մարմնի անդամը, այլ ղեկավարը և աշխատակիցը, ընկերության, դրա ղեկավարների կամ այլ աշխատակիցների հետ փոխկապակցված անձը, ինչպես նաև այն անձը, որը չի բավարարում «Արժեթղթերի շուկայի մասին» ՀՀ օրենքով ընկերության ղեկավարների նկատմամբ սահմանված պահանջները:

14.2. Ընկերության ներքին աուդիտի ղեկավարը/անդամը/ անկախ է իր իրավասություններն իրականացնելիս և հաշվետու է ընկերության ընդհանուր ժողովին:

14.3. Ներքին աուդիտի ղեկավարը/անդամը/

- 1) հսկողություն է իրականացնում ընկերության ընթացիկ գործունեության և ռիսկերի նկատմամբ,
- 2) ստուգում է ընկերության գործունեության համապատասխանությունն օրենքներին, դրանց հիման վրա ընդունված նորմատիվ իրավական ակտերով, կարգավորվող շուկայի կանոններով, ընկերության գործունեության կանոններով, սույն Կանոնադրությամբ և այլ իրավական ակտերով սահմանված պահանջներին:

- 3) տալիս է եզրակացություններ և ներկայացնում առաջարկություններ ընդհանուր ժողովի կողմից ներկայացրած և այլ հարցերի վերաբերյալ:
- 14.4. Ընկերության ֆինանսատնտեսական գործունեության ստուգման նպատակով ընկերությունն ընդհանուր ժողովի որոշմամբ պետք է ներգրավի առողիտ իրականացնող անձի, կնքելով նրա հետ համապատասխան պայմանագիր, որում, բացի առողիտորական եզրակացություն կազմելու պարտավորության ամրագրումից, պետք է նախատեսվեն նաև «Արժեթղթերի շուկայի մասին» ՀՀ օրենքի 84 հոդվածի 3-րդ և 4-րդ կետերով սահմանված պահանջները:
- Առողիտ իրականացնող անձն ընկերության գործունեության տարեկան հաշվետվությունների և հաշվեկշռի ստուգման վերաբերյալ եզրակացությունը ներկայացնում է ընկերության ընդհանուր ժողովին:
- Ընկերության տարեկան հաշվեկշռի հաստատման ժամանակ առողիտ իրականացնող անձի եզրակացությունը պարտադիր է:
- 14.5. Ընկերությունն օրենքով և այլ իրավական ակտերով սահմանված կարգով վարում է հաշվապահական հաշվառում և ներկայացնում է ֆինանսական ու վիճակագրական հաշվետվություններ:
- Ընկերության ընդհանուր ժողովի հաստատմանը ներկայացվող տարեկան հաշվետվության, տարեկան հաշվապահական հաշվեկշռի, շահույթների և վնասների հաշվետվության հավաստիությունը պետք է հաստատվի ընկերության ներքին առողիտորի եզրակացությամբ:
- 14.6. Ընկերության շահերը վտանգվելու կամ պաշտոնատար անձանց թույլ տրված չարաշահումներ հայտնաբերելու դեպքում առողիտ իրականացնող անձն իրավունք ունի պահանջելու արտահերթ ընդհանուր ժողովի անցկացում:
- Ընկերության տարեկան ֆինանսական հաշվետվության վերստուգումը կարող է կատարվել նաև նրա մասնակիցներից յուրաքանչյուրի պահանջով:

15. ԸՆԿԵՐՈՒԹՅԱՆ ԱՌԱՋԱՑՎԱԾ ՍՏՈՐԱԲԱԺԱՆՈՒՄՆԵՐԸ

- 15.1. Իր գտնվելու վայրից դուրս գործունեություն ծավալելու և իր շահերը ներկայացնելու համար ընկերությունը կարող է ստեղծել առանձնացված ստորաբաժանումներ՝ ներկայացուցչություններ և մասնաճյուղեր:
- 15.2. Ընկերությունը Հայաստանի Հանրապետությունում և նրա սահմաններից դուրս չունի մասնաճյուղեր և ներկայացուցչություններ:

16. ԸՆԿԵՐՈՒԹՅԱՆ ՎԵՐԱԿԱԶՄՄԱԿԵՐՊՈՒՄԸ ԵՎ ԼՈՒԾԱՐՈՒՄԸ

- 16.1. Ընկերության վերակազմակերպումը կարող է կատարվել բացառապես մեկ այլ ներդրումային ընկերության հետ միացման կամ վերակազմավորման միջոցով:
- 16.2. Ընկերության վերակազմավորման դեպքում նորաստեղծ իրավաբանական անձին են փոխանցվում վերակազմավորման միջոցով վերակազմակերպված ընկերության իրավունքները և պարտականությունները, որոնք սահմանվում են փոխանցման ակտին համապատասխան:
- Ընկերության վերակազմակերպումն իրականացվում է ՀՀ Քաղաքացիական Օրենսգրքով, «Արժեթղթերի շուկայի մասին» ՀՀ օրենքով և այլ օրենքներով սահմանված կարգով:
- 16.3 Ընկերության լուծարմամբ նրա գործունեությունը դադարում է առանց իրավունքները և պարտականություններն իրավահաջորդության կարգով այլ անձանց անցնելու:
- Ընկերությունը լուծարվում է՝
- ընկերության ընդհանուր ժողովի որոշմամբ (ինքնալուծարում):
 - ՀՀ կենտրոնական բանկի կողմից լիցենզիան ամբողջությամբ ուժը կորցրած ճանաչվելու դեպքում;
 - օրենքով նախատեսված այլ հիմքերով:
- Ընկերությունը կարող է ընդհանուր ժողովի որոշմամբ լուծարվել միայն «Արժեթղթերի շուկայի մասին» ՀՀ օրենքով սահմանված կարգով ՀՀ կենտրոնական բանկի նախնական համաձայնությունը ստանալուց հետո:
- 16.4 Ընկերության լուծարումն իրականացվում է ՀՀ Քաղաքացիական Օրենսգրքով, «Արժեթղթերի շուկայի մասին» ՀՀ օրենքով և այլ օրենքներով սահմանված կարգով և ժամկետներում:
- 16.5 Ընկերությունը համարվում է լուծարված, իսկ նրա գործունեությունը՝ դադարած, այդ մասին ՀՀ կենտրոնական բանկի կողմից գրանցումների մատյանում ընկերությանը գրանցումից հանելու մասին գրառում կատարելու պահից:

17. ԱՅԼ ԴՐՈՒՅԹՆԵՐ

- 17.1. Անհաղթահարելի ուժի (Ֆորս-մաժոր) հետևանքով նյութական կորուստներ ունենալու դեպքում հրավիրվում է ընկերության արտահերթ ընդհանուր ժողով իրադրությունը քննարկելու և յուրաքանչյուր դեպքի վերաբերյալ համապատասխան որոշումներ կայացնելու համար:
- 17.2. Սույն կանոնադրությամբ չպարզաբանված հարցերը լուծվում են ՀՀ Քաղաքացիական Օրենսգրքին, «Սահմանափակ պատասխանատվությամբ ընկերությունների մասին» ՀՀ օրենքին, «Արժեթղթերի շուկայի մասին» ՀՀ օրենքին, ՀՀ միջազգային պայմանագրերին և գործող այլ իրավական ակտերին համապատասխան:

ՏԵՂԵԿՈՒԹՅՈՒՆՆԵՐ ԸՆԿԵՐՈՒԹՅԱՆ ՄԱՍՆԱԿՑԻ ՄԱՍԻՆ

Մասնակցի անունը, ազգանունը, անձնագրային տվյալները, հասցեն	Բաժնեմասերի քանակը (<< դրամ)	Բաժնեմասերի չափը (%)
«Պարադեպլատց Լիմիթեդ» տահմանափակ պատասխանատվությամբ ընկերություն Կիպրոսի Հանրապետության օրենսդրության համապատասխան 2024թ. ապրիլի 9-ին գրանցված ընկերություն, գրանցման համար՝ HE 458581, գրանցման հասցե՝ Անեքսարտիսիաս 37Ա, 3036, Լիմասսոլ, Կիպրոս:	6,999,553,750 (Վեց միլիարդ ինն հարյուր իննսունինն միլիոն հինգ հարյուր հիսուներեք հազար յոթ հարյուր հիսուն դրամ)	100